

## 《大智度論》之布施波羅蜜

(釋厚觀，2006.7.6，於 佛法度假營)

### 一、布施之定義

(一) 財施：有信、有福田、有財物，三事和合時心生捨法，能破慳貪。

《大智度論》卷11，大正25，140c16~21：

問曰：云何名檀？

答曰：檀名布施心相應善思，是名為檀。

有人言：從善思起身口業，亦名為檀。

有人言：有信、有福田、有財物，三事和合時，心生捨法，能破慳貪，是名為檀。譬如慈法，觀眾生樂而心生慈。布施心數法亦復如是，三事和合心生捨法能破慳貪。

※《摩訶般若波羅蜜經》卷 21，大正 8，369b9-12：

是菩薩為眾生故捨內外物，捨時作是念：我無所捨。何以故？是物必當壞敗。菩薩作如是思惟，能具足檀那波羅蜜。

(二) 法施：常以淨心思善，不求名利供養，不自高輕人，以般若、大悲心相應，開示聲聞法、大乘法。

1、《大智度論》卷11，大正25，144a3~12：

非但言說名為法施，常以淨心善思，以教一切是名法施。譬如財施，不以善心不名福德；法施亦爾，不以淨心善思，則非法施。

復次，說法者能以淨心善思，讚歎三寶，開罪福門，示四真諦，教化眾生，令入佛道，是為真淨法施。

復次，略說法有二種：一者、不惱眾生善心慈愍，是為佛道因緣；二者、觀知諸法真空，是為涅槃道因緣。在大眾中興愍哀心說此二法，不為名聞利養恭敬，是為清淨佛道法施。

2、《大智度論》卷 39，大正 25，345b4~11：

是菩薩清淨法施不求名利供養恭敬，不貪弟子，不恃智慧，亦不自高輕於餘人，亦不譏刺，但念十方諸佛慈心念眾生，我亦如是學佛道說法，無所依止適無所著，但為眾生令知諸法實相，如是清淨說法，世世不失智慧光明，乃至阿耨多羅三藐三菩提。

## 二、清淨施與不淨施

《大智度論》卷11，大正25，140c28~141a12：

施有二種：有淨，有不淨。

**不淨施者：**直施無所分別，或有為求財故施，或愧人故施，或為嫌責故施，或畏懼故施，或欲取他意故施，或畏死故施，或狂（誑）人令喜故施，或自以富貴故應施，或諍勝故施，或妒瞋故施，或憍慢自高故施，或為名譽故施，或為咒願故施，或解除衰求吉故施，或為聚眾故施，或輕賤不敬施；如是等種種名為不淨施。

**淨施者：**與上相違名為淨施。復次，為道故施，清淨心生無諸結使，不求今世後世報，恭敬憐愍故，是為淨施。淨施是趣涅槃道之資糧，是故言為道故施。若未得涅槃時施，是人天報樂之因。

參見：1、《大智度論》卷29，大正25，272c5~21。

2、《大智度論》卷33，大正25，304b26~c13。

## 三、行布施時，如何兼斷煩惱

《大智度論》卷11，大正25，141a19~b10：

是布施法，若以求道能與人道。何以故？結使滅名涅槃。當布施時，諸煩惱薄故，能助涅槃。

於所施物中不惜故，除慳。敬念受者故，除嫉妒。

直心布施故，除諂曲。一心布施故，除調。

深思惟施故，除悔。觀受者功德故，除不恭敬。

自攝心故，除不慚。知人好功德故，除不愧。

不著財物故，除愛。慈愍受者故，除瞋。恭敬受者故，除憍慢。

知行善法故，除無明。信有果報故，除邪見。知決定有報故，除疑。

如是等種種不善諸煩惱，布施時悉皆薄，種種善法悉皆得。布施時六根清淨善欲心生，善欲心生故，內心清淨。觀果報功德故，信心生。身心柔軟故，喜樂生。喜樂生故，得一心。得一心故，實智慧生。如是等諸善法悉皆得。

復次，布施時，心生相似八正道。信布施果故，得正見。正見中思惟不亂故，得正思惟。清淨說故，得正語。淨身行故，得正業。不求報故，得正命。慇心施故，得正方便。念施不廢故，得正念。心住不散故，得正定。如是等相似三十七品善法心中生。

- 參見：1、《大智度論》卷30，大正25，280b27~c9。  
2、《大智度論》卷81，大正25，630c19~24。

#### 四、三事因緣生布施：1、信心清淨，2、財物（所施物），3、福田。

《大智度論》卷32，大正25，301b1~25：

菩薩行般若波羅蜜，智慧明利能分別施福。施物雖同，福德多少，隨心優劣。如舍利弗以一鉢飯上佛，佛即迴施狗而問舍利弗：汝以飯施我，我以飯施狗，誰得福多？舍利弗言：如我解佛法義，佛施狗得福多。舍利弗者，於一切人中智慧最上，而佛福田最為第一，不如佛施狗惡田得福極多，以是故知，大福從心生，不在田也，如舍利弗千萬億倍不及佛心。

問曰：如汝說福田妙故得福多，而舍利弗施佛不得大福？

答曰：良田雖復得福多而不如心。所以者何？心為內主，田是外事故。

或時布施之福在於福田。如億耳阿羅漢，昔以一華施於佛塔，九十一劫人天中受樂，餘福德力得阿羅漢。又如阿輸迦王，小兒時以土施佛，王閻浮提，起八萬塔，最後得道。施物至賤，小兒心薄，但以福田妙故得大果報。當知大福從良田生。

若大中之上，三事都具：心、物、福田，三事皆妙。如《般若波羅蜜》〈初品〉中說：佛以好華散十方佛。

復次，又如以般若波羅蜜心布施，無所著故得大果報。

復次，為涅槃故施亦得大報。以大悲心，為度一切眾生故布施亦得大報。

復次，大果報者，如是中說生剎利家乃至得佛者是。

#### 五、菩薩布施時，先施何等人？

（一）《大智度論》卷87，大正25，669b24~c21：

問曰：是菩薩布施時，先施何等人？

答曰：是菩薩雖因眾生起大悲心，而菩薩布施必先供養諸佛、大菩薩、辟支佛、阿羅漢及諸聖人。<sup>1</sup>若無聖人，次第施持戒、精進、禪定、智慧、離欲人。若無此人，施一切出家佛弟子。若無是人，次施持五戒、行十善道及持一日戒、三歸。若無此人，次施中人非正非邪者。若無此人，次施五逆惡人，及諸畜生，不可不與，菩薩以施攝一切眾生故。

<sup>1</sup> 施凡夫不如施初果聖人……，參見：《中阿含》卷39(55)〈須達哆經〉(大正1·677b23~c13)；《中阿含》卷47(180)〈瞿曇彌經〉(大正1·722b20~26)；《分別布施經》(大正1·903a8~15)。

有人言：應先布施五逆罪人、斷善根者、貧窮、老病、下賤、乞丐者，乃至畜生。譬如慈母多有眾子，先念羸病，給其所須。又如菩薩為餓虎欲食子故，以身施之。

問曰：如是種種應先施何者？

答曰：一切眾生皆是菩薩福田，能生大悲故。菩薩常欲以阿耨多羅三藐三菩提施眾生，何況衣食等而有分別。又菩薩得無生忍法，平等無差；未得無生忍者，或慈悲心多，或分別心多，此二心不得俱行。

- (1) 悲心多者，先施貧窮惡人。作是念：種福田中，果報雖大，憐愍眾生故，先利貧者。如是田雖不良，以慈悲心得大果報。
- (2) 分別心多者作是念：諸佛有無量功德故，應先供養。以分別諸法取著佛身故心小，其心雖小，福田良故，功德亦大。
- (3) 若得諸法實相，入般若波羅蜜方便力中，心得自在，二事俱行：慈愍眾生，又視皆如佛。如是等菩薩隨因緣行布施。

1、慈悲心多者：先施貧窮惡人……（田劣而心勝）。

2、分別心多者：先供養佛、菩薩…（田勝而心劣）。

3、得實相，具般若方便者→隨因緣行布施—慈愍眾生又皆視之如佛。

(二) 《維摩詰經》卷上，大正14·543c1~544a16：

佛告長者子善德：汝行詣維摩詰問疾。善德白佛言：世尊！我不堪任詣彼問疾。所以者何？憶念我昔自於父舍設大施會，供養一切沙門婆羅門及諸外道貧窮下賤孤獨乞人，期滿七日，時維摩詰來入會中，謂我言：長者子！夫大施會不當如汝所設，當為法施之會，何用是財施會為？

我言：居士！何謂法施之會？

答曰：法施會者，無前無後，一時供養一切眾生，是名法施之會。

曰：何謂也？

謂：以菩提起於慈心；以救眾生，起大悲心；以持正法，起於喜心；以攝智慧，行於捨心。以攝慳貪，起檀波羅蜜；以化犯戒，起尸羅波羅蜜；以無我法，起羼提波羅蜜；以離身心相，起毘梨耶波羅蜜；以菩提相，起禪波羅蜜；以一切智，起般若波羅蜜。……以得一切智慧、一切善法，起於一切助佛道法。如是善男子，是為法施之會。若菩薩住是法施會者，為大施主，亦為一切世間福田。

世尊！維摩詰說是法時，婆羅門眾中二百人皆發阿耨多羅三藐三菩提心，我時心得清淨歎未曾有，稽首禮維摩詰足，即解瓔珞價直百千，以上之，不肯取。我言：居士！願必納受隨意所與。維摩詰乃受瓔珞分作二分，持一分施此會中

一最下乞人，持一分奉彼難勝如來。一切眾會皆見光明國土難勝如來，又見珠璣在彼佛上，變成四柱寶臺，四面嚴飾不相障蔽。時維摩詰，現神變已，作是言：若施主等心施一最下乞人，猶如如來福田之相無所分別，等于大悲不求果報，是則名曰具足法施。

城中一最下乞人，見是神力聞其所說，皆發阿耨多羅三藐三菩提心。

## 六、布施福德之優劣

唐道世《法苑珠林》卷81（福田部第7），大正53·884b~885a2：

如《優婆塞戒經》云：若施畜生得百倍報，施破戒者得千倍報，施持戒者得十萬報，施外道離欲人得百萬報，施向道者得千億報，施須陀洹得無量報，向斯陀含亦無量報，乃至成佛亦無量報。我今為汝分別諸福田，故作是說；若能至心生大憐愍，施於畜生，專心恭敬，施於諸佛，其福正等無有差別。言百倍得，如以壽命、色、力、安、辯施於彼者，施主後得壽命、色、力、安樂、辯才，各各百倍，乃至無量亦復如是。是故我於《契經》中說，我施舍利弗，舍利弗亦施於我，然我得福多，非舍利弗得福多也。或有人說：受者作惡，罪及施主。是義不然，何以故？施主施時為破彼苦，非為作罪，是故施主應得善果；受者作惡，罪自鍾<sup>2</sup>己，不及施主。<sup>3</sup>

問：若施聖人得福多者，云何經說智人行施不簡福田？

答：今釋此意義有多途，明能施之人，有愚智之別；所施之境，有悲敬之殊。悲是貧苦，敬是三寶；悲是田劣而心勝，敬是田勝而心劣。若取心勝施佛，則不如施貧，故《像法決疑經》云：有諸眾生，見他聚集作諸福業，但求名聞，傾家財物以用布施，及見貧窮孤獨，呵罵驅出不濟一毫，如此眾生名為顛倒作善，癡狂禍福，名為不正作福，如此人等甚可憐愍，用財甚多獲福甚少。善男子！我於一時告諸大眾：若人於阿僧祇身供養十方諸佛并諸菩薩及聲聞眾，不如有人施畜生一口飲食，其福勝彼百千萬倍無量無邊，乃至施與餓狗蟻子等，悲田最勝。<sup>4</sup>

<sup>2</sup> 鍾：當、遭逢。

<sup>3</sup> 參見《優婆塞戒經》卷5（大正24，1058c4-19）。

<sup>4</sup> 《像法決疑經》卷1（大正85，1336a19-b2）：「復有眾生見他聚集作諸福業，但求名聞，傾家財物以用布施；及見貧窮孤獨，呵罵驅出，不濟一毫；如此眾生名為顛倒作善，癡狂修福，名為不正作福。如此人等甚可憐愍，用財甚多，獲福甚少。善男子！我於一時告諸大眾：若人於阿僧祇身供養十方諸佛並諸菩薩及聲聞眾，不如有人施畜生一口飲食，其福勝彼，百千萬倍無量無邊。善男子！我於處處經中說布施者，欲令出家、在家人修慈悲心布施貧窮孤老乃至餓狗，我諸弟子不解我意，專施敬田，不施悲田；敬田者，即是佛法僧寶；悲田者，貧窮孤老乃至蟻子。此二種田，悲田最勝。」

又《智度論》云：如舍利弗以一鉢飯上佛，佛即迴施狗，而問舍利弗，誰得福多？舍利弗言，如我解佛法義，佛施狗得福多。<sup>5</sup>

若據敬法重人識位修道，敬田即勝，故《優婆塞戒經》云：若施畜生得百倍報，乃至須陀洹得無量報，羅漢辟支尚不如佛，況餘類也。

若據平等而行施者，無問悲敬，等心而施得福弘廣，故《維摩經》云：分作二分，一分施彼難勝如來，一分與城中最下乞人，福田無二。<sup>6</sup>

又《賢愚經》云：佛姨母摩訶波闍波提，佛已出家，手自紡織，預作一端金色之氈，積心係想唯俟於佛，既得見佛喜發心髓，即持此氈奉上如來。佛告憍曇彌：汝持此氈往奉眾僧。波提重白佛言：自佛出家心每思念，故手自紡織規心俟佛，唯願垂愍為我受之。佛告之曰：知母專心欲用施我，然思愛心施，福不弘廣，若施眾僧獲報彌多，我知此事是以相勸。<sup>7</sup>

又《居士請僧福田經》云：別請五百羅漢，不如僧次一凡夫僧，吾法中無受別請法，若有別請僧者，非吾弟子，是六師法，七佛所不可。<sup>8</sup>

故知施有三種，故不可以一概論也。

## 七、如何增長布施福德

《大智度論》卷 11，大正 25，141c7~18：

施得時故，報亦增多。如佛說：施遠行人，遠來人，病人，看病人，風寒眾難時施，是為時施。

復次，布施時隨土地所須施故，得報增多。

復次，曠路中施故，得福增多；常施不廢故，得報增多；如求者所欲施故，得福增多；施物重故，得福增多，如以精舍、園林、浴池等；若施善人故，得報增多，若施僧故，得報增多；若施者、受者俱有德故，得報增多；種種將迎恭敬受者故，得福增多；難得物施故，得福增多；隨所有物盡能布施故，得福增多。

※另參見《大智度論》卷 30，大正 25，277a11~24；卷 33，大正 25，304c13~21。

※應時之施：參見《增一阿含》卷 24〈善聚品 32.12〉，大正 2，681b17~21。

<sup>5</sup> 參見《大智度論》卷 32（大正 25，301b3-12）

<sup>6</sup> 參見《維摩詰經》卷上，大正 14，543c1~544a16。

<sup>7</sup> 參見《賢愚經》卷 12，大正 4，434a6-15。

<sup>8</sup> 參見《增一阿含》卷 45〈不善品 48·5〉，大正 2，791c29~792a3。

## 八、三輪體空，以般若波羅蜜方便迴向故，雖少施而得無量無邊福德

《大智度論》卷29，大正25，271c5~27：

佛欲讚般若波羅蜜功德大故，言少施，得大果功德無量。

問曰：如薄拘羅阿羅漢等，亦少施而得大報，何用般若波羅蜜？

答曰：薄拘羅等，雖得果報有劫數限量，得小道入涅槃。菩薩以般若波羅蜜方便迴向故，少施，福德無量無邊阿僧祇。

問曰：何等是方便迴向，以少布施而得無量無邊功德？

答曰：雖少布施，皆迴向阿耨多羅三藐三菩提。菩薩作是念：我以是福德因緣，不求人天中王及世間之樂，但求阿耨多羅三藐三菩提。如阿耨多羅三藐三菩提無量無邊，是福德亦無量無邊。

又以是福德，為度一切眾生，如眾生無量無邊故，是福德亦無量無邊。

復次，是福德用大慈悲，大慈悲無量無邊故，是福德亦無量無邊。

復次，菩薩福德、諸法實相和合故三分清淨：受者、與者、財物不可得故。如般若波羅蜜，初為舍利弗說菩薩布施時，與者、受者、財物不可得故，具足般若波羅蜜。用是實相智慧布施故，得無量無邊福德。

復次，菩薩皆念所有福德如相、法性相、實際相故，以如、法性、實際無量無邊故，是福德亦無量無邊。

## 九、自行布施，教他行布施，讚嘆布施之德，歡喜讚嘆行布施者

《大智度論》卷87(大正25，669a26-b22)：

「自行檀，教人行檀，讚檀功德，歡喜讚行檀」者：善拔慳貪根，深愛檀波羅蜜，慈悲於眾生，通達諸法實相；以此因緣故，能四種行檀波羅蜜。

[1]或有人自行布施，不能教人布施：或畏他瞋；或畏為己教布施，以之為恩。

如是等因緣故，不能教人。

[2]或有人教人布施，自不能施：或有人種種讚歎布施之德，勸人令施而不能自行。

[3]有人自行布施，亦教人布施，稱讚布施之德，而見人布施，不能歡喜。所以者何？或有破戒惡人行施而不喜見。

[4]有人喜見施主而不讚歎，以其邪見不識施果故。

如是，各各不能具足。

菩薩大悲心，深愛善法故，能行四事，如上說。

[1]菩薩若但自布施、不教他人，但能今世少許利益。

[2&3]是眾生隨業因緣墮貧窮處，是故菩薩教眾生言：我不惜財物，我雖多施汝，

汝亦不得持至後世；汝今當自作，後當自得。以布施實功德，種種因緣教眾生行施。

[4]見行施者雖是破戒惡人，但念其好心布施之德，不念其惡，是故歡喜讚歎。

復次，見三寶無盡福田中施故，施福不盡，必至佛道，觀其未來無盡功德故，歡喜行是四種布施，世世財富。

是菩薩雖不為財富布施，未具足阿耨多羅三藐三菩提、六波羅蜜等法，中間而財富自至；譬如人為穀故種禾，而稟草自至。

## 十、何謂布施波羅蜜？

(一)《大品般若經》卷5〈問乘品(摩訶衍品)第18〉，大正8，250a9~13：

云何名檀那波羅蜜？須菩提！菩薩摩訶薩以應薩婆若心，內外所有布施，共一切眾生，迴向阿耨多羅三藐三菩提，用無所得故。

(二)《大智度論》卷46，大正25，395a12~b18：

布施波羅蜜五相：1、用薩婆若相應心，2、捨內外物，3、福共一切眾生，  
4、迴向阿耨多羅三藐三菩提，5、用無所得。

問曰：檀波羅蜜有種種相，此中佛何以但說五相？所謂：用薩婆若相應心，捨內外物，是福共一切眾生，迴向阿耨多羅三藐三菩提，用無所得故。何以不說大慈悲心供養諸佛及神通布施等？

答曰：是五種相中攝一切布施。

[1]相應薩婆若心布施者，此緣佛道、依佛道。

[2]捨內外者，則捨一切諸煩惱。

[3]共眾生者，則是大悲心。

[4]迴向者，以此布施但求佛道，不求餘報。

[5]用無所得故者，得諸法實相般若波羅蜜氣分故，檀波羅蜜非誑非倒亦無窮盡。

問曰：若爾者則不須五種相，但說薩婆若相應心則足。

答曰：此事可爾，但以眾生不知云何應薩婆若心布施義故，是故以四事分別其義。

[1]應薩婆若心者，以菩薩心求佛薩婆若。作緣作念繫心。持是布施，欲得薩婆若果，不求今世因緣，名聞恩分等；亦不求後世轉輪聖王、天王富貴處；為度眾生故，不求涅槃，但欲具一切智等諸佛法；為盡一切眾生苦故，是名應薩婆若心。

[2]內外物者，內名頭腦、骨髓、血肉等，難捨故在初說；外物者，國土、妻子、七寶、飲食等。



[3]共一切眾生者，是布施福德果報，與一切眾生共用；譬如大家種穀，與人共食。菩薩福德果報，一切眾生皆來依附；譬如好果樹，眾鳥歸集。

[4]迴向者，是福德邊，不求餘報，但求阿耨多羅三藐三菩提。

問曰：先言應薩婆若心，後言迴向，有何等異？

答曰：應薩婆若心，為起諸福德因緣。迴向者，不求餘報，但求佛道。

復次，薩婆若相應心，為應阿耨多羅三藐三菩提故施，如先義說薩婆若為主，一切功德皆為薩婆若。讚佛智慧有二種：一者無上正智，名阿耨多羅三藐三菩提。二者一切種智，名薩婆若。

[5]用無所得者，以般若波羅蜜心布施，順諸法實相而不虛誑。如是等說檀羅蜜義。

2006年佛法度假  
厚觀法師講  
《大智度論》之布施波羅蜜